

## Ebe onodode ni IPita O keke

<sup>1</sup> Mhemhe iPita aghiusomhi na kee oyi iJesu iKirisiti mhi keke ebe ona ghi e egbo ni Eshinegba o ze, ni a khi epfese shi elemhi eke agbo, ni a miatse ku asha khi asha eke iPontusi, ali iGalesha ali iKapadosha ali Esha, ali iBitinia. <sup>2</sup> Eri Eshinegba ita o ze e abi o li ghole oli shi, o rote ikanya eyi Ayemhe-nọ-pfuase khuese-a pfuase ni a ke suo eso na iJesu iKirisiti ali ni o ri oia eyi iKirisiti re e khi egbo oda shi ugamhi oyoli.

Opfomhe ali okhale ni e gbeku o, e ka nu e la.

### *A kuęhie Eshinegba shi Irudushi ni o mhue agbo*

<sup>3</sup> Awa kuęhie Eshinegba, ita iJesu iKirisiti Onomhue. Itobo ilelemhi oniemhi ni o mholi na awa o ro rote eghuli guise iJesu iKirisiti le. Onana o ri agbo onogbo ali irudushi ni o mhue agbo na awa. <sup>4</sup> Loli o li ri awa ri eloe shi eke e khe ugu ni Eshinegba o ro shi agho o khe egbo eyoli. Iloghie o re we shi ne, ni o khi asha ni ea la ke-a, ni ea la pfueche, wekhi eri e ya taa. <sup>5</sup> Eye e eni ugu ena e khi, ikhi ee ni a mholi iregbenga, ni Eshinegba o ri ekpabo eyoli khukhu shi e khe imiepfuese, ikhi imiepfuese ni a ya rokhase ikpukhokho agbo. <sup>6</sup> A ze ni onana o ri egbe ke mu e ini o tseku khia khi a ya mholi iyeseudu-a ukuku eghenge irari imhese bino ebubu ni a ya me. <sup>7</sup> Eri a ri ena mu e fe bino ni a me ini egbegbo irudunga oye e o khi. Igholu

ni o li opfu-a, erali a ro o mheso oli bino ni a me ini egbegbo o khi. Igho a ya li mheso irudunga oye ni o mu elo dose igolu bino, ni a me asha mie ekpe ali ikueghie ali ufumhi ele ni ijesu o ya nyene egbe bhale. <sup>8</sup> A nono ingme oyoli, a gbo mie oli suo, aboriekhia khi aa me oli elo ghue. A mholi oghela oniemhi ni unu o dobe e ngme. <sup>9</sup> Itobo khi u mholi imiepfuese elemhi ayemhe oye, o ze khi a miesuo, a regbenga li.

<sup>10</sup> Eri emekeguele ngme ingme okhale ni oo bhale deba e, e kuegbe-a guano bie abi Eshinegba o li ya mie egbo eyoli pfuese, onana o ze ni e ro ngme angme-shi-ekpe oyi oni imiepfuese ona.

<sup>11</sup> Ayemhe oyi iKirisiti ni o la emekeguele udu o gweye we abi ijesu o li ya me osoli, neni o ya me ufumhi oniemhi, eghenge ni e ro ngme ungmehi ameguele. E roshaka guano ni e lese oghuo o ya khi oni iKirisiti ali abi eni ingme e ga li ya de nyaa.

<sup>12</sup> Eshinegba o rokhase eni emekeguele khi o a khi itobo eleli oyewe a ro ri emhi ena khase we ama irari oye e. Memena, eni emekeguele e she gue eni ingme ena nya ye e, abi ekpabo Ayemhe-no-pfuase ni o rote iloghie bhale o li gue we ye we. Eri igeni e lili nono ni weye e li me eni ingme ena.

### *A ke la angeli ipfuase*

<sup>13</sup> Irarigho, a bino angeli bie ke ngeli ni a mu egbe shi ugamhi oyi Eshinegba, a ke te elo ekpe, a ri udu oye e shi isomhelemhi ni a ya me ogbele ni a ya ri iKirisiti khase. <sup>14</sup> Abi eniye ni epe suo eso na Eshinegba ni o la iloghie, a khi nyene egbe ukhokho je angeli ni u kpe ngeli neni a lese ungmehi oyi Eshinegba. <sup>15</sup> Lese khi Eshinegba ni o lu e, o

ma pfluase ni a li gho mholi ingeli ni e pfluase shi emiemini a rieḷe nya. <sup>16</sup> Ebe-no-pfluase oḷo, “Ze ni u khi oni o pfluase, itobo khi mhemhe mhi pfluase.”\*

<sup>17</sup> Ini o khia khi Ita wa lu Eshinegba ini u wa so iromhi, ikhi ita ni oḷa ya gbe azeba ini oḷo gue ezo, ri ekpe ali ulishi ke ga li aborokhia khi oḷfese eke agbo u khi egho. <sup>18</sup> Irari khi a lese khi oḷa khi emhi nabi igolu ali elomho ni eḷe li opfu-a a ro pfa e shi eke, lase elemhi imu ali angeli afue le, ni eni e bia e e roshi eke na e. <sup>19</sup> Oḷia ni e ghale eyi iJesu iKirisiti, ni o khi omi osumha ni oḷa mhue ichimhi, a ro luase obo na awa. <sup>20</sup> Eshinegba o ze oḷi neni a ma agbo, o gbo ri oḷi lasele khase eḷbo ikpukhokho agbo ni awa la ena, irari oye e. <sup>21</sup> Obo oyi iJesu a te mie Eshinegba suo ni o te eghuli guise oni iJesu le, ni o gbo ri ufumhi oniemhi na li, irarigho a mholi irudunga ali irudushi na Eshinegba.

<sup>22</sup> Aborokhia khi a she ri udu eye e khi eni e pfluase egho, abi a ri ungmehi igesikia a gbe akanya, ni a ro mholi inono na egbe e abi a ga miesuo, a kie ligho ke nono ingme egbe e. <sup>23</sup> Irari khi ungmehi oyi Eshinegba ni o mhue agbo na agboagbo a ro rieḷe e bia, oḷa khi emini eḷe pfua a ro rieḷe bia. <sup>24</sup> Ebe-no-pfluase o ngme gho khi,

“Eri eḷbo nya  
     e li abi ebuli.  
 Eri isomotse oyewe  
     o li abi udodo.  
 Ini ebuli o khakha-a,  
     udodo e de o kua.

<sup>25</sup> Ama eri ungmehi

---

\* **1:16** Li ze iLev 11.44,45; iLev 19.2; iLev 20.7

oyi Ẹshinẹgba o laọ agbọagbọ.”†  
Ona o khi usomhi onete ni a tṣẹ abọ ye ẹ.

## 2

### *Ẹchẹ ni o mhọli agbọ ali ushishi no pfuase*

<sup>1</sup> A she riẹlẹ ẹ bia, irarighọ, khi kono onobe shi elemhi deba ọgbọ, khi ke lo ẹgbhọli, khi ke ngeli ingeli abamemhẹ, khi ke dọ ọgbọkhoghuo ọkọnyọ ali khi ke ngme ungmehi yese ọgbọ-a. <sup>2</sup> Ochoghọ, zẹ ni angeli oyẹ ẹ e li abi oyi emọfe. Okiamhi egbegbi amẹ inyeli eyi ayemhẹ ni o khi ungmehi oyi Ẹshinẹgba, o ke gbe ẹ. Eni a kha da, o rẹẹ fu shi imiepfuese, <sup>3</sup> mena ni a she mu Ọnọmhue fẹ bino ni a mẹ ọli mẹ khi ọọ ti.\*

<sup>4</sup> Abi a li bhale deba Ọnọmhue ni ọ khi ẹchẹ nọ mhue agbọ, ni ẹgbọ e kie, ama Ẹshinẹgba ọ zẹ ọli, ọ mu ọli ẹloe. <sup>5</sup> Ighọ, ẹẹ abi echẹ ni e mhue agbọ, a rọ tọ owa ayemhẹ, ni a khi ekpodalo-ugamhi eyi Ẹshinẹgba ni e pfuase, ni a ke luasobo ena ayemhẹ eni e ghọle Ẹshinẹgba, rọte obọ oyi iJesu iKirisiti.

<sup>6</sup> Irari khi Ebe-no-pfuase ọọ,

“A bino khi mhi ri

ẹchẹ gbe eke shi iZayo,

ẹchẹli ẹbẹ ni o mu owa mhue,

ni mhi zẹ ni o mu ẹloe.

Oni ọ da ri egbe da li ne,

ọa ya mẹ omama.”†

<sup>7</sup> Irari khi ẹchẹ ona oni o mu ẹloe o khi na ẹẹ ni a mie ọli suọ. Ama eni ẹa mie ọli suọ, o khi,

“Ẹchẹ ni itsọna e kie,

ni o tigbe mele oni

† 1:25 Li zẹ Aza 40.6-9 \* 2:3 Li zẹ Iwolo 34.8 † 2:6 Li zẹ Aza 28.16

o mu ẹloe ne nya-a.”‡  
 8 “Onana o kie gbo khi  
 ẹche ni ebubu ẹgbọ  
 e ya khọlo awẹ shi  
 ukpokpomhi ẹche  
 ni o ya pfi wẹ gbe.”

Itobọ khi ẹa ri ungmehi oyi Ẹshinẹgba gbe akanya  
 e rọ de. Abi o kha li wẹ o li egbo. §

9 Ama eni Ẹshinẹgba ọ zẹ a khi, ni a khi ekhemhẹ  
 ni ẹẹ ga Ẹshinẹgba, ushishi na ipfuase, ẹgbọ enayi  
 Ẹshinẹgba, ni a rọ mẹ asha ri ikuẹghie na oni ọ rọte  
 alo ebili lu ẹ lasele bhale ákpá ni o somhotse oyọli.\*

10 Eghẹghẹ ni o dọsẹ aa kpẹ khi ẹgbọ eyi Ẹshinẹgba,  
 ama memena, ẹgbọ eyi Ẹshinẹgba a ke khi, aa kpẹ  
 mhọli ilẹlemhi na ẹ, ama memena Ẹshinẹgba ọ she  
 mhọli ilẹlemhi na ẹ. †

### *Ighumha eyi Ẹshinẹgba*

11 Emọle mhe, mhi lema ẹ, ẹẹ abi epfese ni a  
 la elemhi agbo ona, a lase oghumhẹ ni e khi eyi  
 olamhe le, ni e mu okhọli ẹ vule shi isamhi eyẹ ẹ  
 ọ. 12 A kie ke ngeli ingeli enete elemhi ifuabọ oyi  
 ẹgbọ ni ẹa miesuọ. Ini e tseku ẹ zẹ ẹ unu, e kie ke  
 mẹ ingeli enete ni a ngeli, ni e ke kuẹghie Ẹshinẹgba,  
 ogbẹle ni ọ ya bhale deba awa.

### *Iregbe-tiemhie na Enighie ali Ega eyawa*

13 A ri itobọ Onomhẹ ke ri egbe ẹ tiemhie na eni  
 ẹẹ mhẹsẹ nya ni a mu vule shi iteva ẹgbọ. Okekhi  
 oghie ni ọ funẹ, 14 okekhi igovunọ ni oni oghie ọọ

‡ 2:7 Li zẹ Iwolo 118.22 § 2:8 Li zẹ Aza 8.14-15 \* 2:9 Li zẹ  
 Okiali 19.5-6; Aza 43.20,21; iDeut 4.20; 7.6; 14.2; iTatọ 2.14; Aza 9.2

† 2:10 Li zẹ Osia 2.23

ghie ọ ke nase eni e pfido, ali e ke kuęghie eni e rieę onete. <sup>15</sup> Irari khi eri Eshineęba ọọ nono ni a pfi eębo ọkhọlo okpe unu, rote angeli enete ni a ya ke ngeli. <sup>16</sup> A ke ngeli abi eębo ni ęa mhọli ọzuode, ama a khi zudigba umha mhọli ọzuode oyeę ke ngeli ingeli ebe. A ke ngeli abi eni eę ga Eshineęba. <sup>17</sup> A ke ri ekpe na oębokpa. A nono ingme oyi eębo ni a ga ro khi ena irudunga. A ke na ulishi oyi Eshineęba. A gbo mu ekpe e na oghie.

<sup>18</sup> Eę ni a khi eni eę ga, a ri egbe e tiemhi eke na eni e khi ega eye e. Oa khi ega ni eri opfomhe ngeli deba e tse ama li shi eni e ngeli angeli ni o ze deba e. <sup>19</sup> Eshineęba ọ ya khivose ne ini u ri egbe mie osoli anasemhe ni u wa kha me, itobo khi u lese oghumhe oyi Eshineęba. <sup>20</sup> Eleli onoghwo o la ọ ini oębo ọ me osoli shi umha-sueso ni ọ rieę? Ama ini u wa me osoli shi onete ni u rieę, ni u ro ri egbe mie oli, Eshineęba ọ ya khi vose ne shi ọ. <sup>21</sup> Irari onana Eshineęba ọ ro lu e, abi iJesu ọ ro me osoli na e ro ri angeli irokhokho shi eke na e ni a ke deba. A roshęka ke deba oni angeli. <sup>22</sup> Oa lamhe olamhe okhoghuo, wekhi eri a me khi ọ ngme ungmehi eębhọli. ‡ <sup>23</sup> Abi eębo e ro tseku u tsue oli, ọa tsue we shi ọ. Abi ọ ro tseku me osoli ọa tsekha we. Ama eri ọ ri eębọli mhọli Eshineęba obo, oni ọ guę so ezo shi ode igesikia. § <sup>24</sup> IKirisiti lolighwo ọ tsua olamhe eyawa shi egbe je apfida, ini awa khi ghu eghuli olamhe, ama ni awa la agbo igue-ngeli elemhi ipfuase. Utse ni a kuale oli o ri awa ze. \* <sup>25</sup> Eri a kpe la agbo abi osumha ni ọ waa, ama

‡ 2:22 Li ze Aza 53.9    § 2:23 Li ze Aza 53.7    \* 2:24 Li ze Aza 53.5

a she mu pfi deba Ọni Ọrisumha-kia ni ọ khi ọni ọ khekhe ayemhe o ye.†

### 3

#### *Angeli oyi ikpotso ni e la ughue ali odọ we*

<sup>1</sup> Eẹ ni a khi ikpotso, a nyese ukhomhi na edo e, ishegho a khi me ongewe ni o a mie ungmehi oyi Eshinegba suo, ni eni edo e ri itobo ekpe ni a mhọli a na we ali angeli eyi e mu udu pfi, ini aa ke tseku ngme ungmehi unu lasele,\* <sup>2</sup> ini ee me angeli ipfuase ali angeli ekpe ni a ngeli. <sup>3</sup> Khi ze ni isomhotse oye o rote akhue idiegbe ri egbe khasẹ, ni a la do itsu shi ukhomhi dolodolo, ali ena igolu isoso ali igbano itsua ni e somhotse.† <sup>4</sup> Ochogho, ze ni isomotse oye o khi ona ekelemhi udu. Isomhotse ni o a ya taa, ni o khi ona ikuegba ali ayemhe no pfomhe, ni o ghole Eshinegba ne nya. <sup>5</sup> Ina ikpotso eni elele ni e ri egbe da Eshinegba, e li ri egbe we shi isomotse, irari khi e nyese ukhomhi na edo we. <sup>6</sup> Abi iSera o li mu ekpe na odoli Aburaamu ramhi ni o ro lu oli, onomhuemhe. Imi oni iSera a khi, ini a da ngeli ingeli enete ne, ni aa ro da ze ni ulishi o mu e.‡

<sup>7</sup> Igho, ee edo, a gue ke ngeli deba ighue e. A ri iwomhelo nu we ke ngeli. A lese khi ea mhue ekpabo abi ee. A gbo lese khi eni e nu e mhọli okemhi shi isomhopfa oyi isomhelemhi oyi Eshinegba ni o mhọli agbo onogbo e li khi. A gue ri eloe ke khu we, ini emhikhoghuo o khi zu iromhi oyeede.§

---

† **2:25** Li ze Aza 53.6 \* **3:1** Li ze Efi 5.22; iKolo 3.18 † **3:3** Li ze 1 iTimo 2.9 ‡ **3:6** Li ze Igbae 18.12 § **3:7** Li ze Efi 5.25; iKolo 3.19

*Imẹ-osoli shi onete iriẹle*

<sup>8</sup> Ọzukhomhi ungmehi oyemhe khi, eẹ nya a mholi udu oghuo, a mholi ilelemhi na egbe, a nono ingme egbe abi inyoghuo, a vie osoli ke na egbe, a ke ri egbe e tiemhile. <sup>9</sup> Khi ri onobe fata onobe. Ini ogbo o tsue e, khi tsue o li shi o, ochoghọ sọ iromhi onete na li. Itobo khi eri Eshinegba o luẹ ni u khi ogbo oyọli, ni u le ikhivose ugu. <sup>10</sup> Irari khi, oni o da a nono

ni loli me agbo li  
 ali ni loli mholi  
 ebubu ogbele enete,  
 o khi ke ri elemhi oyọli  
 ngme ingmemhi ebe,  
 ali ingmemhi egbhọli.

<sup>11</sup> O mema ya me  
 ingmobe na,  
 o o riẹle onete.

O o mema ya ke  
 nono opfomhe,  
 o na khu o li.

<sup>12</sup> Irari khi eri ukpeloe  
 oyi Onomhue o la  
 egbo eni e guẹ ngeli egbe,  
 esọ eyọli e khueghie-a  
 shi iromhi ni e sọ,  
 ama elemhi e ma bi

Onomhue deba egbo okhọlo.\*

<sup>13</sup> Oghuo o ya ri emhi obe li e, ini onete iriẹle o mema ghọle e? <sup>14</sup> Ama ini u tseku me osoli shi onete iriẹle, ikhivose o khi ne. “Khi na ulishi ogbokhoghuo.” <sup>15</sup> Ama a rote eke elemhi udu oyee

\* **3:12** Li ze Iwolo 34.12-16



rue iJesu abi Ọnọmhuẹ oye ẹ. A ke mu egbe shi eke ẹghẹghẹkpa, ini ọgbọkhọghuo ọ ya mhila ẹ emini irudushi oyeẹ o migha nga, ni a gue ọli ye wẹ. Ama a ri ipfomhẹ-udu ali ekpe ke so wẹ ọ.† 16 Zobẹ ni udu oye o pfuase ishegho ni eni ẹ ngme onobe shi angeli onete oye abi oni ọ deba iKirisiti, e me omama ingmemhi ipfueche ọgbọ-a eyewe. 17 Ini o ghole Ẹshinegba ni u ro me osoli shi itobo khi u riẹle onete, o ti dose khi u me osoli shi okholo ni u riẹle. 18 Irari khi iKirisiti ọ ghu-a shi olamhe oyi ọgbokpa utoghuo kpe, ikhi lolu ni ọ pfuase, ọ me osoli na ena umhapfuase, ni ọ ro rue awa bhale ghi Ẹshinegba. A gbe ọli-a alo gbugbugbu, ama ọ la agbo elemhi ayemhe, a ri Ayemhe guise ọli le bhale agbo. 19 Elemhi ayemhe ni ọ la, ọ ro vu ya tse abo usomhi onete oyi Ẹshinegba ye iyemhe ni e la owa ighumha. 20 Iyemhe ena e khi eni ẹa suo eso, abi Ẹshinegba ọ ro ri abo mu udu, ni iNoa ọ ro khali oko-okẹ oniemi se. Egbọ etu-olale kpele a pfuese elemhi oni amẹ.‡ 21 Oni amẹ o migha shi ibatizi, ona o mie ẹ pfuese memena. Oa khi ilese khue ichimhi idiegbe-a, ama, imholi udu ni o pfuase deba Ẹshinegba ni ọ tsumhi ẹ rote irote eghuli guale oyi iJesu iKirisiti. 22 IJesu iKirisiti ọ she je iloghie, ọ shito epfe obo obita oyi Ẹshinegba, ọ mhese ẹ na igeni ali afu ali ekpabo ni e la idane.

## 4

### *Angeli ni o mu pfi*

1 Abi o ro khia khi iKirisiti ọ she me osoli idiegbe, a li mu egbe ni a li ya mholi angeli oghogho, irari

† 3:15 Li ze iMat 5.10; Aza 8.12-13    ‡ 3:20 Li ze Igbae 6.1--7.24

khi ọni ọ da ligho me osoli idiegbe ne, ọa ke gbo mholi emini ọ ri olamhe e rieler. <sup>2</sup> Rote memena je odalo elemhi agbo oye, khi gbo ze ni oghuemhe idiegbe oye o mhesere ne, ochogho, ze ni u ke ngeli abi Eshinegba ọ li nono ọli shi. <sup>3</sup> A she kpe pfuse ukpokpomhi egheghe-a je ukhokho ro ọ rieler emini eni ẹa miesuo e rieler. A la agbo itsebo ilili, idokonyo, idonyo yesegbe-a, ali idobie, ali ikia-ye-ukue ke da onyo, ali ilitsa igaga. <sup>4</sup> Ama memena, abo e sha we khi aa ke nu we a rieler ikhiakhiamhi emini ee rieler, e ri itobo igho ọ tsue e. <sup>5</sup> Ama khi e mema ya gueye Eshinegba abi e li gbe, oni ọ ya gue egbo ezọ, shi eni e laọ ali eni e ghua. <sup>6</sup> Onana o ze ni a ro tse abo usomhi onete ye egbo ni e ghua, ni a ro gue we ezọ abi a li ya gue egbo na agbo ezọ, ama eri e la elemhi ayemhe abi Eshinegba ọ la ọ.

*Gue ri ukpeloe ke khu isomhopfa eyi Eshinegba*

<sup>7</sup> Egheghe ni agbo o ro ya pfo o she ti ramhi ana. Irarigho, a bino angeli bie ke ngeli ni a dobe toto obo iromhi isoso. <sup>8</sup> Oni o mema mu egbe ne nya khi, a nono ingme egbe e egbegbo, itobo khi eri inono ọọ khukhu olamhe ebubu.\* <sup>9</sup> A ke mu egbe e epfese, ni awolo ọa la. <sup>10</sup> Ogbogbo ọ ri isomhopfa ni ọ mhuere ke kpaghie onuzava oyoli obo, ọ ri igesikia ke ri eloe khu okhale oyi Eshinegba odekhode. <sup>11</sup> Ini ogbokhoghuo ọ mholi ungmehi ya ngme, ọ ke ngme ungmehi oyi Eshinegba. Onini ọ ya kpaghie ogbo obo, ọ ri itoto ni Eshinegba ọ ro na li rieler ọli. Ni a ro bhale ya e khi a rote obo oyi iJesu iKirisiti ri ikueghie na Eshinegba odekhode. Loli ọ mholi

---

\* **4:8** Li ze Ekpi 10.12

ufumhi ali ekpabọ rọte agbọagbọ ya je agbọagbọ. Atse.

*Imẹ-osoli irari khi u miesuo*

<sup>12</sup> Emọle mhe abọ e khi sha ẹ shi omufe ni o toto ni a me, abine khi emini aa kpe me ghue a me. <sup>13</sup> Ari ochogho ke ghele khi a li nu iKirisiti me osoli ni o me. Eghẹghẹ agho ni a mhọli oghẹle oniemi, ini a ri ufumhi oyọli khasẹ. <sup>14</sup> Ini a ri itobọ eva oyi iKirisiti ẹẹ tsue ẹ, ikhivose o khi ne, irari khi Ayemhe oyi ufumhi ali oyi Eshinegba o nu ẹ la. <sup>15</sup> Ini u me osoli, khi ze ni a bhale ya ẹ khi itobọ khi u gbe ugbeli ali itobọ khi u do ighiatọ, wekhi angeli ikpamhika ali itashingme u ro me osoli. <sup>16</sup> Ama ini u wa me osoli abi oni o miesuo, khi ze ni omama o mu ẹ, ama ke kueghie Eshinegba irari khi u wa yemhe eva oyọli. <sup>17</sup> Irari khi eghẹghẹ o she ramhi ni iguezo o ro ya rọte Owa oyi Eshinegba ya gbaekele. Ini o te awa egbe gbaekele, se o ke beshi ya li eni ẹa mie usomhi onete oyi Eshinegba suo egbe? <sup>18</sup> Abi Ebe-no-pfuase o ngme o li khi,

“Ini o ya munu ni a ro tsumhi  
 ọgbọ ni ọ guẹ ẹ ngeli,  
 se o ke bie ya li  
 ẹgbọ okhọlo ni ẹa mhọli  
 Eshinegba egbe?”†

<sup>19</sup> Irarigho, eni ẹẹ me osoli, abi o li ghole Eshinegba shi, e ri egbe we mhọli Eshinegba ni o ma we ni o ze ri egbe ẹ nga obọ. E kie ke gbe ikanya enete.

---

† **4:18** Li ze Ekpi 11.31

## 5

*Ude ni a ye Egbhali ali ozele*

<sup>1</sup> Mhi lolo ye ẹ ude, ẹẹ ni a khi egbhali abi mhemhẹ mhi li khi ogbhali, ni mhi ri ẹloe me osoli ni iJesu o me, ni mhi gbo li ya mholi okemhi shi ufumhi oyoli ini o nyene egbe bhale. <sup>2</sup> A ri ẹloe ke khu isumha eyi Ẹshinegba ni a ro nga ẹ obo. O ga pfo ẹ udu ke ri ẹloe khu we. Oa khi irari eleli ni u ya me o tse, ama abi ogo ni o mholi oghuemhe ugamhi oyi Ẹshinegba.\* <sup>3</sup> Khi ri itoto mhesẹ na ego ni Ẹshinegba o ro nge obo, ochogho angeli o ye o khi irokhokho ni ego ke deba. <sup>4</sup> Ini iJesu iKirisiti ni o khi Orelloe-khu isumha onofune o bhale, o ya ri arula oghie ni oa tigbe ya taa ne.

<sup>5</sup> Eẹ ezele, a li ligho nyese ukhomhi ke na egbhali. Ogbokpa o ke ti egbe oli tiemhi eke, aa ga egbe e. Irari khi Ebe-no-pfuase o ngme gho khi.

“Ẹshinegba o ma biselemhi  
ogbo ni o ti egboli a nga,  
ama o khi e vose na eni  
e ti egbewe e tiemhile.”†

<sup>6</sup> Irarigho, a ri egbe e tiemhile na ekpabo oyi Ẹshinegba ni e fune, ni o ti e nga idane ini o ramhi oni eghẹghẹ.‡ <sup>7</sup> A ze otoemhe eye e obo na Ẹshinegba, itobo khi o ya rue e o le.

<sup>8</sup> A bino angeli bie ke ngeli, aa tokpe, itobo khi obe e ni o khi okphaghie, o kia gasẹ abi odumhi ni oo khoshe, eri o nono oni o ya mu nyanole. <sup>9</sup> Khi ze oli lo e le! Gbe lighi irudunga oye, itobo khi u lese khi eni e miesu nabi yeye ni e la elemhi

\* 5:2 Li ze iJon 21.15-17 † 5:5 Li ze Ekpi 3.34 ‡ 5:6 Li ze iMat 23.12; iLuk 14.11; 18.14

agbọ ashakhasha e lili ẹ mẹ osoli enabi enana.  
<sup>10</sup> Ini u mẹ osoli ukuku ẹghẹghẹ se, Ẹshinẹgba na okhale nya, ni ọ rọte iKirisiti lu ẹ shi ufumhi oyọli na agbọagbọ, ọ ya riẹlẹ ẹ ti dọsẹ abi o kpẹ li ẹ egbe. Ọ rẹ toto, ọ mu ẹ mhọli rẹ gbelighi. <sup>11</sup> Ekpabọ o khi oyọli agbọagbọ. Atsẹ.

*Otse ni o kpukhokho*

<sup>12</sup> ISalasi ni mhi rọ shi inyọghuo ni ọ mhọli igesikia ọ nu mhe keke ebe ona. Eri mhi keke ebe ona ni ọa nuẹ ghi ẹ, rọ ri udu shi ẹ ọ ali ni a rọ lẹsẹ khi emiemini a riẹ mẹ khi egbegbi okhale oyi Ẹshinẹgba na. A mu ọli mhue gagaga. §

<sup>13</sup> Ẹgbọ eni e miesuọ ni a zẹ abi ẹẹ na eke iBabilọ, ẹẹ tse ẹ, li shi iMaki ni ọ limhe egbe abi omimhe.\*

<sup>14</sup> A ke tse egbe ẹ a ri inono ghele mu egbe. Opfomhe o ka nu ẹẹ nya ni a la elemhi iKirisiti la.

---

§ 5:12 Li zẹ Ika 15.22,40  
 15.37-39; iKolo 4.10; iFilẹ 24

\* 5:13 Li zẹ Ika 12.12,25; 13.13;

**Ebe-No-Pfuasę Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 21 Feb 2024 from source files  
dated 29 Jan 2022

03be06b0-68fd-500b-b9a9-6bca4b63979a